

Օգոստ. 6-ի նիստում Յ. Քաջազնունին պատասխանեց եղած քննադատութիւններին: Նա յայտնեց, որ ինքը գիտակցաբար խուսափել է լայն ու անիրագործելի խոստումներից և կառավարական ծրագրի մէջ դրել է միայն օրւայ հրատապ կարեւորութիւն ունեցող հարցեր: Իր քաղաքականութեան հիմքը կազմելու են քաղաքացիական ազատութիւններն ու ռամկավար սկզբունքները: Արտաքին քաղաքականութեան ասպարէզում մնալու է Բաթումի դաշնագրի տեսակէտի վրա և դրանից մագաչափ շեղում չի թոյլատրելու: Ապա իբրև եզրափակում, դրեց հաւանութեան պահանջ:

Այդ պահանջին ընդառաջ գնացին միայն դաշնակցականներն ու մահմետականները. միւս պատգամաւորները դէմ եղան: Այսպիսով, դեռ գործի չսկսած, ծագեց կառավարական տաղնապ:

Փափուկ դրութիւնից դուրս գալու համար յայտարարեց ընդմիջում, որից յետոյ ժողովրդականների մի մասն էլ միացաւ դաշնակցականների բանաձևին, և կառավարութիւնը ստացաւ վստահութեան քէ: Յօդուտ կառավարութեան քէֆարկեցին դաշնակցականները, 4 ժողովրդականներ, մահմետական և ուսս պատգամաւորները. ձեռնպահ մնացին 5 սոց.-դեմ., 3 սոց.-յեղ., 2 ժողովրդական և 1 անկուսակցական՝ Պ. Չաքարեանը, որը յետագային, համարեա միշտ, ընթացաւ սոց.-դեմոկրատների հետ միասին:

Այսպիսով, իր կեանքի առաջին խսկ օրից, Հայաստանի Խորհուրդը դուրս եկաւ ներքին շաղախից գուրկ, ամուր մեծամասնութիւն չունեցող, հակամարտութիւններով և անակնկալներով հարուստ մի մարմին: Նրա այս հիւանդութիւնը բնածին էր և մինչև վերջ էլ կարելի չեղաւ բուժել: